

摘藻堂四庫全書薈要

集部

欽定四庫全書薈要

集部

明文衡卷十二

三

詳校官候選知縣臣吳甸華



欽定四庫全書薈要卷二萬一百六十五

集部

明文衡卷十二

明程敏政編



說

天說上 劉基

或曰天之降禍福於人也有諸曰否天烏能降禍福於人哉好善而惡惡天之心也福善而禍惡天之道也為善者不必福為惡者不必禍天之心違矣使天而能降

禍福於人也而豈自戾其心以窮其道哉天之不能降
禍福於人亦明矣曰然則禍福誰所為與曰氣也曰氣
也者孜孜焉為之與曰否氣有陰陽邪正分焉陰陽交
錯邪正互勝其行無方其至無常物之遭之禍福形焉
非氣有心於為之也是故朝菌得濕而生晞暘而死蘼
草得寒而生見暑而死非有心於生死之也生於其所
相得而死於其所不相得也是故正氣福善而禍惡邪
氣禍善而福惡善惡成於人而禍福從其所遇氣有所

偏勝人不能禦也曰然則天聽於氣乎曰否天之質茫
茫然氣也而理為其心渾渾乎惟善也善不能自行載
於氣以行氣生物而淫於物於是乎有邪焉非天之所
欲也人也者天之子也假於氣以生之則亦以理為其
心氣之邪也而理為其所勝於是乎有惡人焉非天之
欲生之也朱均之不肖而以為子非堯舜之所欲也螭
蛔生於人腹而人受其害豈人之欲生此物哉曰然則
天果聽於氣矣曰否天之氣本正邪氣雖行於一時必

有復焉故氣之正者謂之元氣元氣未嘗有息也故其復也可期則生於邪者亦不能以自容焉秦政王莽是已曰跖之壽操懿之得其志而子孫享之豈天之有所私邪曰氣之復也有遲有速而人之生也不久故為惡之人或當其身而受罰或卒享福祿而無害當其身而受罰者先逢其復者也享福祿而無害者始終乎其氣者也以懿繼操以裕繼懿不於其身而於其後昆謂天之有所私不可也故見禍福而謂之天降於人者非也

氣未復而以禍福責於天亦非也不怨天不尤人殀壽不貳修身以俟惟知天者能之

天說下

或曰天灾流行陰陽舛訛天以之警於人與曰否天以氣為質氣失其平則變是故風雨雷電晦明寒暑者天之喘吁呼噓動息啟閉收發也氣行而通則陰陽和律呂正萬物竝育五位時若天之得其常也氣行而壅壅則激激則變變而後病生焉故吼而為暴風鬱而為虹

蜺不平之氣見也抑拗憤結迴薄切錯暴怒溢發冬雷

夏霜驟雨疾風折木漂山三光盪摩五精亂行晝昏夜
明瘴疫流行水旱愆殃天之病也霧濁星妖暈背侵氛
病將至而色先知也天病矣物受天之氣以生者也能
無病乎是故瘡癘天札人之病也狂亂反常顛蹶披猖
中天之病氣而不知其所為也雖天亦無如之何也惟
聖人有神道焉神道先知防於未形不待其幾之發也
堯之水九載湯之旱七載天下之民不知其災朱均不

才為氣所勝則舉舜禹以當之桀紂反道自絕於天則
率天下以伐之元氣之不汨聖人為之也白然則人勝
天與曰天有所不能而人能之此人之所以配天地為
三也曰書曰作善降之百祥作不善降之百殃非與曰
此天之本心也而天有所不能病於氣也惟聖人能救
之是故聖人猶良鑿也朱均不肖堯舜鑿而瘳之桀紂
暴虐湯武又鑿而瘳之周末孔子善鑿而時不用故著
其方以傳於世易書詩春秋是也高文光武能於鑿而

未聖故病少愈而氣不盡復和安以降病作而無其鑿
桓靈以鉤吻為參苓而操懿之徒又加鳩焉由是病入
于膏肓而天道幾乎窮矣曰然則元氣息矣乎曰有元
氣乃有天地天地有壞元氣無息堯舜湯武立其法孔
子傳其方方與法不泯也有善鑿者舉而行之元氣復
矣作天說

雷說上

有夫耕於野震以死或曰畏哉是獲罪於天天戮之矣

劉子曰噫誣哉何觀天之局也一夫有罪天將自戮之乎天生民而立之牧付之以生殺之權而又自震以討焉惡用是司牧者為也曰天鑒於民有隱慝焉人罰弗能及也而震以威之微顯闡幽神道也曰惡是何言也古帝制刑以為天下均故執刑如執權因罪之輕重而前卻之又不敢專而聽於天曰天討也夫是之謂贊天地之化育今日天又自以震戮人罪吾不知天之所自戮者以何等罪乎謂其積之極人不能勝而戮之邪則

天下之為人子而不孝為人臣而不忠為人長而不慈
為人幼而不遜為人友而不義為人妻而不順賊義戕
仁縱私而滅公倚勢而行姦乘約而肆淫人言而獸心
陰慘而陽和磨牙吮血腹膏刮骨擅威作福殘害正直
而違于司寇之誅者不為不多矣豈司雷者有所畏乎
乃不一有戮而庸夫乎戮焉使彼有以覘天之意而謂
天之所怒在彼而所容在此也則恃以不忌是天以震
勸逆而濟禍也豈天道哉必不然矣曰然則雷何物也

曰雷者天氣之鬱而激而發也陽氣團於陰必迫迫極而迸迸而聲為雷光為電猶火之出燬也而物之當之者柔必穿剛必碎非天之主以此物擊人而人之死者適逢之也不然雷所震者大率多於木石豈木石亦有罪而震以威之邪

雷說下

或曰雷有神焉有諸曰人曰有之曰然則雷神所為而非氣矣曰否雷與神皆氣之所為也氣也者無所不能

為也忽而形倏而聲為雷為神或有或無不可測知人
見其忽而形也而謂之神夫神也者妙萬物而無形形
則物矣是故有形而有質者有形而無質者有暫者有
久者莫非氣所為也氣形而神寓焉形滅而神復于氣
人物鬼神或常或變其歸一也曰既為神也而曰不能
戮人罪何邪曰神形而暫者也彼且不能久其形惡能
求罪人而戮之

鑽燧說

宋濂

宋子間居見家人夏季改火不用桑柘取赤槌二尺中
析之一剡成小空空側開以小隙一副圓大與空齊稍
銳其兩端上端截竹三寸冒之下端真空內以細絢纏
其腰別藉卉毛於隙下左手執竹右手引絢急旋轉之
二槌相軋摩空木成塵烟輒起塵自隙流毛上候其烟
箭勃以虛掌覆空鬱之則火燄燄生矣宋子嘆曰火在
木中不鑽則火不見萬善具於人性不學則善不明人
何可不學哉

猿說

武平產猿猿毛若金絲閃閃可觀猿子尤奇性可馴然
不離母母黠不可致獵人以毒傅矢伺母間射之母度
不能生灑乳于林飲子灑已氣絕獵人取母皮向子鞭
之子即悲鳴而下斂手就制每夕必寢皮乃安甚者輒
抱皮跳擲而斃嗟夫猿且知有母不愛其死況人也邪

雜說二首

王禕

蜈蚣與雞不相類也而其讐最甚雞見蜈蚣必殄而噬

之人被蜈蚣螫者塗以雞涎痛隨瘳然雞死蜈蚣輒入其腹嚙之不置蚊與鼈不同羣也而其怨尤深鼈被蚊嘍無不斃而人欲辟蚊者粉鼈甲骨蕪之蚊聞其臭率皆避去即不避無能生存者夫蠢蠢之物有知而無識者也蜈蚣見殄於雞雞雖死矣必復其讐於既死鼈見斃於蚊蚊固生也猶報其怨使不能生物性之烈有如此嗚呼人有識矣操害人之心而不顧人之讐怨於已亦何其不善自恕也哉

蝟之為物毛善刺人能跳入虎耳虎或噬之蝟皮頑不能死則穴虎腹以出而其性惡鵲見鵲便自仰腹受啄烏賊之為物無有皮介每暴於冰上狀若已死人取之易甚而其性好烏烏有下啄則卷而食之嗚呼蝟與烏賊其形相萬也其好惡不相侔也蝟孳然而可畏烏賊塊然而可狎孳然可畏者宜能害鵲而反受害於鵲塊然可狎者宜不可害烏而卒致害於烏此其理誠有不可解者然則人固有孳然而惡人者其可畏塊然而好

人者其可狎邪

染說 蘇伯衡

凡染象天象地象東方象南方象西方象北方象草木
象翟象雀以為色取蠶取梘取藍取茅蒐取索盧取豕
首取象斗取丹秣取浼水取欄之灰以為材熾之漚之
暴之宿之淫之沃之塗之揮之漬之以為法一入再入
三入五入七入以為候天下染工一也於此有布帛馬
衆染工染之其材之分齊同其法之節制同其候之多

寡同其色之淺深明暗枯澤美惡則不同其深而明澤而美者必其工之善者也其淺而暗枯而惡者必其工之不善者也蓋天下之技莫不有妙焉染之妙得之心而後色之妙應於手染至於妙則色不可勝用矣夫安得不使人接于目而愛玩之乎此惟善工能之非不善工可能也夫工於染者之所染與不工於染者之所染其色固有間矣然雖工者所染之布帛與天地四方草木翟雀其色則又有間矣無他天地四方草木翟雀之

色二氣之精華天之所生也天下之至色也布帛之色假乎物采人之所為也非天下之至色也學士大夫之於文亦然經之以杼軸緯之以情思發之以議論鼓之以氣勢和之以節奏人人之所同也出于口而書于紙而巧拙見焉巧者有見于中而能使了然於口與手猶善工之工於染也拙者中雖有見而詞則不能達猶不善工之不工於染也天下之技莫不有妙焉而況於文乎不得其妙未有能入其室者也是故三代以來為文

者至多尚論臻其妙者春秋則左丘明戰國則荀況莊
周韓非秦則李斯漢則司馬遷賈誼董仲舒班固劉向
揚雄唐則韓愈柳宗元李翱宋則歐陽修王安石曾鞏
及吾祖老泉東坡頴濱上下數千百年間不過二十人
爾豈非其妙難臻故其人難得歟雖然之二十人者之
於文也誠至於妙矣其視六經豈不有逕庭也哉六經
者聖人道德之所著非有意於為文天下之至文也猶
天地四方草木翟雀之為色也左丘明之徒道德不至

而其意皆存於為文非天下之至文也猶布帛之為色也學者知詞氣非六經不足以言文玄非天黃非地青非東方赤非南方白非西方黑非北方夏非翟緞非雀紅綠非草木不足以言色可不汲汲於道德而惟文辭之孜孜乎天台方希直從太史宋公學為文章其年甚少而其文甚工不惟同門之士未有及之者自朝之縉紳以至四方之老成凡與宋公友者無不推許之以為不可及余每過宋公退即希直讀其所為文未嘗不擊

節而歎其有得於文之妙也今希直將歸其鄉大肆其力於文故因以此勉焉余自蚤歲徒盡心於文章垂五十而迄無聞不知自勉乃欲勉希直寧不知愧然希直得余說而及時以道德自任則又何至若余哉此余之所以致愛助於希直也

默齋說

天下之道有小者近者費者而又有大者遠者隱者其小者近者費者我可以言傳也人亦可以言求也其大

者遠者隱者不可以言求諸我也猶不可以言傳諸人
也言不可得而傳也故夫子罕言命不可以言而求之
也故子貢得聞夫子之文章而不得聞夫子之言性與
天道夫言傳不可也豈不可心授乎夫言求不可也豈
不可心領乎焉有心授心領而不默焉而契若針之於
石者乎此非苟默而已矣誠以為道至微妙非言語所
能形容也苟闡道而事乎言語之末非惟不足以盡之
且將開是非之端而好奇立異者不勝夫紛紜也孰若

默示以行而使之默悟之為愈哉是故善學者欲求父子之道惟潛心於其所以親欲求君臣之道惟潛心於其所以義欲求夫婦長幼朋友之道惟潛心於其所以別所以序所以信而於天下之物莫不昏然未得則默而思也既得則默而行也扣之而不答也難之而不辨也詰之而不告也咻之而不顧也吾方深思力行之不暇而暇答暇辨暇告暇顧乎哉如是則其於道也察之精矣見之審矣得之深矣執之固矣昌言不得而排之

高談不得而動之新說不得而惑之飛語不得而沮之
夫安往而不默乎故其默也豈三緘其口哉默契於無
言之域也非欲不默其能不默乎彼囁囁者皆於道無
得者也不惟無得亦未嘗見焉卒然而問而莫知夫問
之為是為非泛然而應而莫知其應之為非為是而遽
然是其所非非其所是是非未脫口而左右前後之毀
譽已盈耳則又譁然而與之爭雖欲默其能默乎而況
為學之務先治其心心之在人也未應接欲靜將應接

欲明既應接欲一而主默焉默則無慮默則無欲默則

無為無為則一無欲則明無慮則靜靜則足以制動明

則足以燭奧一則足以御煩默也者心法也故善學者

務之遊於夫子之門三千人而秀出其間者獨顏回從

事心齋而終日默如愚而夫子亦獨稱之曰好學甚矣

默之難也是故顏回慎默也慎默而後恭默恭默而後

淵默雖堯舜之治天下亦豈外淵默哉都兪吁咈是不

得已而然也要其極致夫何為哉恭已正南面而已矣

蓋其精神心術常與造物游於無聲無臭之表其默其天是以先天而天弗違後天而奉天時不必若後世之君臣日夜勞於論議而天地自位萬物自育中國自治四夷自服也至哉默乎為學之先務為治之要道乎禮部侍郎括蒼吳君景玄嘗以默名其齋而徵說於余謂景玄昔處山林而事學也既以顏回之所以治心者治心今處朝廷而事上也當以堯舜之所以治天下者治天下則其為是齋也非徒與共學者默契於無言之域

而已因為著余之所聞者以為說且將觀厥成焉

鼠說 胡儼

胡子夜卧有鼠嚙于案其聲磔磔然胡子懼鼠之傷其書也乃暗投一杖杖不能中鼠鼠暫止而復作遂命童子起而逐之鼠稍竄去及童子就枕鼠復嚙不已時狸奴乳別室胡子度鼠之不能去也於是命童子取狸奴置卧内由是向之磔磔者寂不聞矣噫人非不靈於鼠制鼠不能於人而能於狸奴狸奴非靈於人鼠畏狸奴

而不畏人然則彼各有職也君子居其職者亦盡其職而已矣作鼠說

泣麟圖說

金寔

聖人之情性備中和之極發之宜無不中節竊怪顏淵死夫子哭之過哀而不自知謂其親之之至也則天倫之親莫如父子未聞其哭鯉如此之過也蓋道在天地而任之在聖人仲尼後文武周公五百有餘歲而生人不得位以行其道思欲明其道傳之以詔後世而我高

弟子未達一間者又先我而死如之何其弗慟也其曰
天喪予天喪予非以傷回也傷其道之無傳也厥後魯
人西狩而至仁之靈物忽踣於叔孫氏之車焉方是時
也上無明王下無方伯亂臣賊子接迹當世彼是物者
胡為乎來哉若以其為吾夫子而出以斃於鉏商之手
不猶吾夫子之幾不免於匡宋乎是尤可悲也舉世無
識之者獨吾夫子識之反袂拭面泣涕霑襟哀其出不
逢時所以嘆吾道之窮耳於是乎假魯史以修經撥亂

世反之正以明百王之大法而絕筆於獲麟之一語左氏所謂因所感而起故所以為終身是矣而後世之論咸謂麟出為聖經之應比之馬出河龜出洛而圖書顯簫韶奏而鳳凰儀是蓋欲以神道設教爾若果以為瑞應則當去網罟絕陷穽從容在園游泳在郊使吾夫子見之將欣欣然有喜色又何以泣為由是觀之則知吾夫子之泣麟蓋與慟顏淵同一哀痛之機也是皆發乎性情之正而豈有過哉會稽管君雍仲為兗州府推官

嘗得是圖於闕里好事者以示予因為著其說

物形說 李賢

萬物之形不出方圓二者然草木鳥獸之類由天生者其形圓惟器用室宇之類由人為者方圓兼之大抵出於自然者未有不圓而方者反是蓋圓之出於自然者以有理為主也理即太極假使有形無不圓者故周子為圖以示人亦必圓其形焉或謂天圓而地方地豈不出於自然乎曰以地為方者據其平言之也殊不知

天包乎地地如卵黃蓋亦未嘗不隨天而圓其形焉且
紙窓之隙初無圓者日來射之其形必圓蓋亦隨日之
形耳水波之靜雖曰平焉以物投之其紋必圓天一生
水水亦隨天之形耳以類而推之莫不皆然于以見造
化之知矣

明文衡卷十二

欽定四庫全書蒼要卷一萬一百六十六

集部

明文衡卷十三

明程敏政編

解

釋附

儒解

王禕

有用之謂儒世之論者顧皆謂儒為無用何也曰非論者之過也彼所謂無用誠無用者也而吾所謂有用者則非彼之所謂無用矣夫周公孔子儒者也周公之道

嘗用於天下矣孔子雖不得其位而其道即周公之道天下之所用也其為道也自格物致知以至於治國平天下內外無二致也自本諸身以至於徵諸庶民建諸三王本末皆一貫也小之則云為於日用事物之間大之則可以位天地育萬物也斯道也周公孔子之所為儒者也周公孔子遠矣其遺言固載於六經凡帝王經世之畧聖賢傳心之要粲然具在後世儒者之所取法也不法周公孔子不足謂為儒儒而法周公孔子矣其

不可謂為有用乎噫斯吾之所謂儒也其果世之所謂
無用者乎且世之所謂無用者我知之矣縫掖其衣高
視而闊步其為業也咕畢訓詁而已耳綴緝辭章而已
耳問之天下國家之務則曰我儒者非所習也使之涉
事而遇變則曰我儒者非所能也嗟乎儒者之道其果
盡於訓詁辭章而已乎此其為儒也其為世所詆訾而
蒙迂闊之譏也固宜謂之為無用固誠無用矣而又何
怪焉姑孰潘君章甫儒之有用者也自為右史即以嘉

言謹論上簡主知歷僉湖廣浙東憲所至赫赫有政譽
用是入中書為參議遂拜江西按察使夫陪鈞軸總憲
度國家之任莫重焉而君則迭任之此其為有用夫人
之所知也抑余之所知固有大於是者周公孔子之道
吾將望之儒者之效庶幾賴以暴白於天下寧如今日
所見而已乎雖然有用之用難矣而無用之用亦不易
也若余者蓋業於無用之用流於迂闊不能以自返者
也君盍有以教我乎哉余嘗執筆繼君後知之也深故

於其行解儒以為贈

豢龍解

朱右

龍非可豢也可豢非龍也夫龍淵潛而天飛能小大致雲雷澤下土神變莫測豢養何加焉豢養得加之則非龍矣番禺舟入貢由南海入廣有物蜿蜒長七尺魚身牛首繭角鱗甲爪牙鬚鬣具如龍舟人以木穿穴其中置海水以豢養之將獻京師且曰初為漁網得之若黿鼉魚鰲然吾固知其為非龍也天下大獸五鱗之長為龍

而龍有神不神不足以長物也羸之長為人而人有聖不聖不足以長人也或以人為非也聖斯全人矣以龍為龍非也神斯全龍矣人將不以聲利惑則龍不可以養得故曰人無慾猶龍然作養龍解

中星解

貝瓊

中星見於作歷之法尚矣天有定星星無定位各於四時考之南方而堯典言象言次言星之不同何也永嘉鄭氏本於孔注互見之說諸家無以易之蓋南言朱鳥

則知東為蒼龍西為白虎北為玄武矣東言大火則知
南為鶉火西為大梁北為玄武矣西言虛北言昴則知
南為星東為房矣余求之經而參之考亭所論豈特以
互見為文哉天道至幽至遠而聖人察之至精至密春
言星鳥以二十八宿各復於四方而星鳥適見於昏中
故舉而言之至於仲夏則朱鳥轉而西蒼龍轉而南而
大火適見於昏中不可以象言亦不可以星言矣秋之
中星則玄武七宿之虛宿冬之中星則白虎七宿之昴

宿故於此獨舉一宿焉大抵天以星為體而有廣狹遠
近明暗早晚惟中者則載之故月令仲春昏弧中旦建
星中餘月皆舉二十八宿而此獨非者以弧近并建星
近斗并斗不可的指故舉弧建以定昏旦之中則知堯
典所載豈非以其中之所見而言乎聖人考中星以正
作訛成易之事析因夷隩之宜所謂術不違天政不失
時者如此然堯時冬至日在虛昏中昴至朱子之時則
日在斗昏中壁此見歲差之由而歲差之由恒於中星

知之苟以為互見其法無乃甚疎邪吁差之毫釐繆以千里而學者不之詳也故表而著之

釋統上 方希古

仁義而王道德而治者三代也智力而取法術而守者漢唐宋也強致而暴失之者秦隋也篡弑以得之無術以守之而子孫受其禍者晉也其取之也同而身為天下戮者王莽也苟以全有天下號令行乎海內者為正統邪則此皆其人矣然則湯武之與秦隋可得而班乎

漢唐之與王莽可得而竝乎莽之不齒乎正統久矣以其篡也而晉亦篡也後之得天下而異乎晉者寡矣而獨黜莽何也謂其無成而受誅也使光武不興而莽之子孫襲其位則亦將與之乎抑黜之乎昔之君子未嘗黜晉也其意以為後人行天子之禮者數百年勢固不得而黜之推斯意也則莽苟不誅論正統者亦將與之矣嗚呼何其戾也正統之說何為而立邪苟以其全有天下故以是名加之則彼固有天下矣何必加以是名

也苟欲假此以寓褒貶正大分申君臣之義明仁暴之別崇陽抑陰扶天理而誅人偽則不宜無辨而猥加之以是名使聖智夷乎暴桀順人者等乎逆弑也僥倖而得天下者雖其勢力之強無所為而不成然其心私計而深念未嘗不畏後世之公議今將立天下之大法以為萬世勸戒不能探其邪正逆順之實以明其是非而槩以正統加諸有天下之人不亦長僥倖者之惡而為聖君賢主之羞乎適事機之會庸材小人皆可以得志

處非其地用非其時聖君賢主亦不足以成治功古之能統一宇內而動不以正者多矣秦隋其尤也動不以正而以正統稱之使文武周公而有知其不羞與之同此名乎故謂周秦漢晉隋唐宋均為正統猶謂孔子墨翟莊周李斯孟軻揚雄俱為聖人而傳道統也其孰以為可非聖人而謂之聖人人皆知其不然不可為正統而加之以正統之號則安之而不知其不可是尚可以建之萬世而無弊乎名者聖人之所慎也季子然以冉

求仲由為大臣孔子忿然爭之若二子之才魯之諸臣莫及也苟為大臣未見其為過而孔子慎而不許蓋才如仲由冉求而以為大臣則伊尹周公將曷以名之乎伊尹周公大臣也則二子非其類矣故曰可謂具臣矣以秦隋而方乎周豈直若二子之與伊尹周公哉使孔子而出其不混而稱之也決矣蓋必有其道焉而不可知矣嘗試論之曰天下有正統一變統三三代正統也如漢如唐如宋雖不敢幾乎三代然其主皆有恤民之

心則亦聖人之徒也附之以正統亦孔子與齊桓仁管仲之意歟奚為變統取之不以正如晉宋齊梁之君使全有天下亦不可為正矣守之不以仁義戕虐乎生民如秦與隋使傳數百年亦不可為正矣寇盜而制中土女后而據天位治如苻堅才如武氏亦不可繼統矣二統立而勸戒之道明僥倖者其有所懼乎此非孔子之言也蓋竊取孔子之意也

釋統中

正統之說立而後人君之位尊變統之名立而後正統之說明舉有天下者皆謂之正統則人將以正統可以智力得而不務修德矣其弊至於使人驕肆而不知戒舉三代而下皆不謂之正統則人將以正統非後世所能及而不勉於為善矣其弊至於使人懈怠而無所勸其有天下同也惟其或歸諸正統或歸諸變統而不可必得故賢主有所勸而奸雄暴君不敢萌凌上虐民之心朱子綱目之作所以誅暴止亂於前而為萬世法也

立一法而不足盡天下之情偽則小人將馳騫乎法之外而竊笑吾法之疎是孰若無法之愈乎故正統以處其常而參之以變統然後其變可得而盡也朱子之意曰周秦漢晉隋唐皆全有天下矣固不得不與之以正統苟如是則仁者徒仁而暴者徒暴以正為正又以非正為正也而可乎吾之說則不然所貴乎為君者豈謂其有天下哉以其建道德之中立仁義之極操政教之原有以過乎天下也有以過乎天下斯可以為正統不

然非其所據而據之是則變也以變為正奚若以變為
變之美乎故周也漢也唐也宋也如朱子之意則可也
晉也秦也隋也女后也寇盜也不謂之變何可哉正統
則處之以天子之制變統則不得並焉正統之君非吾
貴之也變統之君非吾賤之也賢者得民心得民心民
斯尊之矣民尊之則天與之矣安得不貴之乎非其類
無其德民必惡之當時惡之後世以其位而尊之則違
乎天矣故不得不賤之也貴不特於其身而又延及於

子孫雖甚愚不肖苟未至於亡國猶尊之以正統之禮
賤不特於其身而其子孫雖有賢知之才亦不能掩其
惡夫如是而後褒貶明夫如是而後勸戒著夫如是而
後正統尊奸邪息

釋統下

夫所謂變統之制者何也異於天子之禮也彼生以天
子養沒以天子葬儼然帝中國而臣四夷天下莫與敵
大矣曷為而異其禮蓋其所可致者勢也不可僭乎後

世者義也勢行於一時義定於後世義之所在臣不敢私愛於君子不敢私尊於父大中至正之道質諸天地參諸鬼神而不惑也何謂天子之禮正統是也正統之君始立則大書其國號謚號紀年之號凡其所為必書所言必書祀典必書封拜必書書后曰皇后書太子曰皇太子后及太子没皆曰崩葬必書其陵其謚有事可紀者紀其事所措置更革曰詔曰令曰制兵行曰討曰征曰伐施惠曰赦曰大赦施刑當罪曰誅曰伏誅違上

國之地其民有思中國而叛之者曰起兵以地降者曰來歸不為中國而反者彼亦不得而盜賊之也亦曰起兵得郡則曰取其郡其誘正統之臣曰誘執曰執殺曰殺將相則名其主正統之臣降于寇盜則寇盜之死不曰卒而曰死凡力能為正統之患者滅亡則異文書之以致喜之之意正統亂亡則詳書而屢見之以致惜之之意變統之異於正統者何也始一天下而正統絕則書甲子而分註其下曰是為某帝某元年書國號而不

書大書帝而不書皇書名而不著謚其所為非大故不
書常祀不書或書以志失禮或志禮之所從變則書立
后不書尊封其屬不書非賢臣雖王公拜罷卒葬不書
行幸非關得失不書詔令非有更革不書其崩曰殂后
死曰薨大臣曰卒佐篡弒贊征伐以危正統者曰死聚
斂之臣曰死酷吏曰死浮屠之位尊而因事得書者曰
死毀正統陵廟宮室名其主用兵不曰討不曰征伐刑
其人曰誅天下怨而起兵惡而起兵不曰反惡乎篡

弑非惡乎君也惡乎寇盜惡乎女主非其君故不得以君道臨之也惟於其臣於其部落則得與其罪士之仕變統者能安中國則書能止暴亂除民害則書能明道術於後世則書有愈貴而愈賤者有愈賤而愈貴者利祿寵倖之臣愈貴而愈賤也守道不污之士愈賤而愈貴也故君子之於變統外之而不親也微之而不尊也斷斷乎其嚴也閔閔乎恐其久也望望乎欲正統之復也是何也為天下慮也奚而為天下慮使女主而乘君

位寇盜而制中土篡弒而不亡暴虐而繼世生民之類
幾何而不滅乎立變統所以扶人極能言抑變統者君
子之所取也

辨

祿命辨 宋濂

三命之說古有之乎曰無有也曰世之相傳有黃帝風
后三命一家而河上公實能言之信乎曰吾聞黃帝探
五行之精占斗罡所建命大撓作甲子矣所以定歲月

推時候以示民用也他未之前聞也曰然則假以占命果起於何時乎曰詩云我辰安在鄭氏謂六物之吉凶王克論衡云見骨體而知命祿覩命祿而知骨體皆是物也況小運之法本許慎說文已字之訓空亡之說原司馬遷史記孤虛之術蓋以五行甲子推人休咎其術之行已久矣非如呂才所稱起於司馬季主也泐及後世臨孝恭有祿命書陶弘景有三命抄畧唐人習者頗衆而張一行蔡道茂李虛中咸精其書虛中之後唯徐

子平尤造其闡奧也曰十一曜之說古有之乎曰無有也書云在璿璣玉衡以齊七政所謂七政日月水火木金土也而無紫氣星孛羅暉計都也星孛數見於春秋或見大辰或入北斗紫氣則載之史冊與氛祲同占羅暉計都者蝕神首尾也又謂之交初交中之神初中者交食之會也借此以測日月之蝕也唐貞元初李弼乾始推十一星行歷鮑該曹士為皆業之士為又作羅計二隱曜立成歷起元和元年及至五代王朴著欽天歷

且謂蝕神首尾頗行之民間小厯而已若吳伯善若甄
鸞若劉孝孫若張胄玄之所造但云七曜而不聞有十
一星也曰然則假之以占命又起於何時乎曰洪範云
月之從星則以風雨伶州鳩云武王伐殷歲在鶉火月
在天駟則以星占國亦已久矣而未必用之占命也曰
以星占命奈何曰予嘗聞之於師其說多本於都呼約
蘇經都呼蓋都賴也西域康居城當都呼水上則今所
傳約蘇經者婆羅門術也李弼乾寶婆羅門伎士而羅

睽計都亦胡梵之語其術蓋出於西域無疑晁公武謂
為天竺梵學者於此徵之尤信也曰術之緣起則吾既
得聞命矣然亦巧發而竒中乎曰有固有之而不可泥
也何也且以甲子幹枝推人所生歲月展轉相配其數
極于七百二十以七百二十之年月加之七百二十之
日時其數終於五十一萬八千四百夫以天下之廣兆
民之衆林林而生者不可以數計日有十二時未必一
時唯生一人也以此觀之同時而生者不少何其吉凶

之不相同哉呂才有云長平坑卒未應共犯三刑南陽
貴士何必俱當六合誠足以破其舛戾矣三命之說予
不能盡信者此也天以二十八宿為體體則為經有定
所而不可易以五星為用用則為緯恒絡繹乎其間或
遲或留或伏或逆固有常度而可以理測苟謂躔某宿
則吉厯某宮則凶猶或可言也設其星有變其行不依
常經而犯乎河漢內外諸星又將何以占之哉或如前
所謂生同一時者其躔次無不同吉與凶又何懸絕哉

夫萬物皆出於五行安有五行之外又有四餘土水行
度最遲而為吉凶者久故有餘氣而氣為木之餘計為
土之餘猶或可言也水之餘則孛火之餘則羅果何所
取義哉水火土木然矣奈何金獨無餘氣乎或謂相生
故有而相尅故無亦非通論也況孛乃妖星或有或無
而氣羅計三者本非星也不知何以有躔度之說哉十
一曜之說予不能盡信者此也曰秦漢以來諸儒推十
二國分野十二次度数及其所入州郡躔次毫釐若無

差忒者既可占國豈不能占人乎曰天運地維動靜不同故先正云有分星而無分野占國者不可盡泥也占國者不可盡泥況占命乎曰五星之精發乎地而昭乎天其分配十日十二子名雖殊而理則同也人資天地以生山林之民毛而方謂得木氣之多也川澤之民黑而津謂得水氣之多也得火氣之多則丘陵之民專而長也得金氣之多則墳衍之民皙而瘠也至於豐肉而痺則得土氣之多而所謂原隰之民也然則彼皆非歟

曰五土有異而民生以之此固然也人之賦氣有薄厚短長而貴富賤貧壽夭六者隨之吾不能必也亦非日者之所能測也蹈道而脩德服仁而惇義此吾之所當為也不待占者之言而後知之也予身脩矣倘貧賤如原憲短命如顏淵雖晉楚之富趙孟之貴彭鏗之壽有不能及者矣命則付之於天道則責成於已吾之所知者如斯而已矣不然委命而廢人白晝攫人之金而陷於桎梏則曰我之命當爾也怠窳偷生而不嗜學至老

死而無聞則曰我之命當爾也剛復自任操办而殺人
柔暗無識投繯而絕命則又曰我之命當爾也其可乎
哉其可乎哉所以先王知山川異制民生異俗剛柔緩
急遲速異齊五味異和器械異度衣服異宜於是脩其
教不易其俗齊其政不易其宜所以卒歸於雍熙之治
也昔者鄭大夫裨竈言鄭當火請以瓘斝玉瓚襮之子
產不之與已而果然竈復云不用吾言鄭又將火子產
曰天道遠人道邇非所及也鄭卒不復火嗚呼此不亦

祿命之似乎吾知盡夫人道而已爾曰近世大儒於祿命家無不嗜談而樂道之者而予一切屏絕之其亦有所本乎曰有子宰言命

孔子生卒歲月辨

或有問於濂者曰孔子之生傳記所載歲月不同公羊氏云魯襄公二十一年冬十有一月庚子孔子生穀梁氏之說年之與日同於公羊而謂冬十月孔子生則與公羊實差一月月因差矣至賈逵注二十一年經云此

年仲尼生昭公二十四年服虔載賈逵語云仲尼時年三十五則皆以孔子為二十一年生也司馬遷著孔子世家云孔子生於襄公二十二年則與公羊穀梁實差一歲日則雖與公羊同而月復與穀梁異杜預主司馬遷以注左氏傳謂二十二年生司馬貞主穀梁公羊以證史記謂二十一年生遷誤為二十二年者蓋以周正十一月屬之明年也孔若古主公羊穀梁謂為不易之論胡舜陟主司馬遷謂如穀梁公羊所書則孔子出處

之年與經史諸子皆不合孔宗翰亦主司馬遷羅泌之
議畧與宗翰同洪興祖主穀梁而謂周家改月十月二
十一日庚子即夏之八月二十一日馮去疾見傳記異
辭則造為調人之言曰襄公二十一年實己酉之歲也
是歲八月置閏以歷法積之則大雪節當在十月十七
日或十八日是為十一月朔氣又三四日方為庚子是
孔子之生已在十一月之節矣既在十一月則是二十
二年庚戌歲首無疑公羊書為十一月似誤而非誤也

司馬遷書為二十二年而又謂孔子之年七十三以卒亦未嘗誤也穀梁於年於月皆據實而書公羊於年亦據實而書於月則以節書謂有日可以表見也司馬遷於年則以節書三者皆非誤也若是衆言之不齊何如濂應之曰公羊穀梁二氏傳經之家也傳經之家當有講師以次相授且去孔子時又為甚近其言必有據依司馬遷固良史則後於穀梁公羊者也吾則無徵乎爾孔子所生之年吾當從公羊氏穀梁氏然以春秋長歷

考之二十一年己酉十一月無庚子庚子乃在十月之
二十一日孔子所生之月吾當從穀梁氏注家謂己酉
為己卯耶耶之文相近故誤書也曰孔子周流諸國之
年世家所記多不可考宋之大儒或取之若如子言無
不遲一歲者遷尚不足信乎曰衛靈公之時孔子適衛
又適陳匡人以為陽虎而拘之世家謂孔子使從者為
甯武子臣於衛然後得去按武子仕於成公之朝至穆
公末武子之子相已與孫良夫將兵侵齊則武子年當

耄矣復歷定獻二公凡三十七年至靈公三十八年而孔子至衛使武子猶在其年將一百五十有餘歲矣武子之事然也孔子之年乃獨可信乎非惟此也孔子去魯世家謂定公十四年年表則又謂為十二年以年表為是則世家為非以世家為是則年表為非一書之中自相矛盾若此他蓋不足深論皇王大紀曰遷載孔子言行不得其真者尤多言行且爾而況於年乎曰洪興祖謂周之十月即夏之八月者然乎曰非也三代雖異

建而月則未嘗改也殷嘗建丑矣書則曰惟元祀十有
二月秦嘗建亥矣史則曰元年冬十月舉前後以例之
則周制可知孔子作春秋行夏之時為萬世法不過截
子丑二月於前歲之終耳月固不之改也否則春入於
夏夏入於秋錯亂而不成歲矣曰馮去疾謂十月庚子
在大雪後即為十一月者可乎曰亦非也世之星史歷
生以六物占人休祥當氣會之交固有生於己酉而以
庚戌歲推之者孰云吾儒乃有是邪此野人之語舍之

勿以汗齒牙可也曰孔子之生子既得聞命矣其卒之時亦有一定之說乎曰左氏云魯哀公十六年夏四月己丑孔丘卒司馬遷遵之諸儒又從而遵之理之所在孰得而違之故孔子所卒之年吾當從左氏然十六年乃壬戌之歲也是歲四月戊申朔有乙丑而無己丑己丑乃在五月之十二日己與乙文亦相近故誤書也所謂乙丑則四月十八日謂當夏正二月十八日者非也謂十六年為辛酉己丑日為戊戌者亦非也自壬戌歲

上朔已酉孔子之年乃七十四謂七十三者尤非也曰
近代王應麟博極羣書者也頗致疑於是而謂今不可
考矣子乃質言之何邪曰衆言紛淆者當折衷以經經
無明載當索之於傳索之於傳不猶愈於史乎謂今不
可考者過矣曰子之言辨則辨矣夏周二正千古難決
之疑也何言之若易易邪曰是非爾所知也雖磬徂徠
之松以為煤盡剡溪之藤以為楮未能竭吾喙也他日
當為受春秋者詳焉

犧尊辨 胡翰


禮有犧尊即獻尊也司尊彝曰其朝踐用兩獻尊其再獻用兩象尊鄭氏讀獻為犧又音犧為摩莎之莎非也獻舉其事犧言其象其為尊一而已以其尊之一而謂其音亦同不可也犧尊與象尊相須鄭氏謂犧尊飾以翡翠象尊以象鳳皇其說亦非也蓋犧尊為牛形象尊為象形皆周尊也王肅云犧象之尊全刻牛象之形鑿背為尊宋劉杳信古者犧尊彝尊皆刻木為鳥獸鑿頂

及背以出納酒二家之言近之而杳又云魯郡地中得
大夫子尾送女器有尊作犧牛形晉永嘉中青州盜發
齊景公冢獲二尊狀類牛象意者古之遺制也苟以為
刻木安能久置地中不壞或謂犧尊畫牛象尊畫象亦
以木耳非古之遺制也蓋二尊皆以銅為之其取義皆
以牛象而得名犧尊為犧形象尊為象形則犧當讀為
義獻當讀如憲各如其字之本音可也獻舉其事犧言
其象不害其為器之一也觀於閔宮之詩朱子不取毛

氏沙飾之義而今猶取鄭氏摩挲之音豈非過乎況杳
之言足以證肅之說有足信乎宋皇祐中得著尊阮逸
胡瑗取其器有脰名壺尊可也著地無足名著尊可也
未能必其主名及黃長睿見之始定為著尊以為尊皆
有脰唯其無足而著地則禮之明堂位所謂商尊曰著
者是也後有長睿者安知不以余言為然乎余故具著
于此以見名物度數在先王時不過有司之事降及後
世雖學者不得而盡考焉則夫斯禮之失也久矣

明文衡卷十三

謹案卷十三第十四頁前六行都呼舊作都利又
約蘇舊作聿斯今並改後倣此



總校官庶吉士 臣張能照

校對官庶吉士 臣陳崇本

謄錄監生 臣衛子忠

欽定四庫全書薈要

集部

明文衛卷十四

五

詳校官候選知縣臣吳甸華



欽定四庫全書蒼要卷二萬一百六十七

集部

明文衡卷十四

明 程敏政 編

辨

洛書辨 王禕

洛書非洪範也昔箕子之告武王曰我聞在昔鯀陞洪水汨陳其五行帝乃震怒不畀洪範九疇彝倫攸斁鯀則殛死禹乃嗣興天乃錫禹洪範九疇彝倫攸叙初不

言洪範為洛書也孔子之繫易曰河出圖洛出書聖人則之未始以洛書為洪範也蓋分圖書為易範而以洪範九疇合洛書則自漢儒孔安國劉向歆諸儒始其說以謂河圖者伏羲氏王天下龍馬出河負圖其背其數十遂則其文以畫八卦洛書者禹治水時神龜出洛負文其背其數九禹因而第之以定九疇後世儒者以為九疇帝王之大法而洛書聖言也遂皆信之而莫或辨其非然孰知河圖洛書者皆伏羲之所以作易而洪範

九疇則禹之所自叙而非洛書也自今觀之以洛書為
洪範其不可信者六夫其以河圖為十者即天一至地
十也洛書為九者即初一至次九也且河圖之十不徒
曰自一至十而已天一生水地六成之水之位在北故
一與六皆居北以水生成於其位也地二生火而天七
成之故二與七皆居南以火生成於其位也以至東西
中之為木金土無不皆然至論其數則一三五七九凡
二十五天數也皆白文為陽為奇二四六八十凡三十

地數也皆黑文而為陰為偶此其陰陽之理奇偶之數生成之位推而驗之於易無不合者其謂之易宜也若洛書之為洪範則於義也何居不過以其數之九而已然一以白文而在下者指為五行則五行豈有陽與奇之義乎二以黑文而在左肩者指為五事則五事豈有陰與偶之義乎八政皇極稽疑福極烏在其為陽與奇五紀三德庶徵烏在其為陰與偶乎又其為陽與奇之數二十有五為陰與偶之數二十通為四十有五則其

於九疇何取焉是故陰陽奇偶之數洪範無是也而徒指其名數之九以為九疇則洛書之為洛書直而列之曰一二三四五六七八九足矣奚必黑白而縱橫之積為四十五而效河圖之為乎此其不可信者一也且河圖洛書所列者數也洪範所陳者理也在天惟五行在人惟五事以五事參五行天人之合也八政者人之所以因乎天也五紀者天之所以示乎人也皇極者人君之所以建極也三德者治之所以應變也稽疑者以人

而聽於天也庶徵者推天而徵之人也福極者人感而
天應之也是則九疇之自一至九所陳者三才之至理
而聖人所以參贊經綸極而至於天人證應禍福之際
以為治天下之法者也其義豈在數乎豈如易之所謂
天一地十者中含義數必有圖而後明可以索之無窮
推之不竭乎漢儒徒見易係以河圖與洛書並言而洛
書之數九遂以為九疇耳審如是則河圖之數十也伏
羲畫卦何為止於八乎此其不可信者二也先儒有言

河圖之自一至十即洪範之五行而河圖五十有五之數乃九疇之子目夫河圖固五行之數而五行特九疇之一耳信如斯則是復有八河圖而後九疇乃備也若九疇之子目雖合河圖五十有五之數而洛書之數乃止於四十有五使以洛書為九疇則其子目已缺其十矣本圖之數不能足而待也圖以足之則造化之示人者不亦既疎且遠乎而況九疇言理不言數故皇極之一不為少庶徵之十不為多三德之三不為細福極之

十一不為鉅今乃類而數之而幸其偶合五十有五之數使皇極儕於庶徵之恒暘恒雨六極之憂貧惡弱而亦備一數之列不其不倫之甚乎且其數雖五十有五而於陰陽奇偶方位將安取義乎此其不可信者三也班固五行志舉劉歆之說以初一日五行至威用六極六十五字為洛書之本文以本文為禹之所叙則可以為龜之所負而列於背者則不可天既有是六十五字則九疇之理與其次序亦已粲然明白矣豈復有白文

二十五黑文二十而為戴履左右肩足之形乎使既有是六十五字而又有是四十五數竝列於龜背則其為贅疣不亦甚乎此其不可信者四也且箕子之陳九疇首以鯀陞洪水發之者誠以九疇首五行而五行首於水水未平則三才皆不得其寧此彝倫之所為斁也水既治則天地由之而立生民由之而安政化由之而成而後九疇可得而施此彝倫所為叙也彝倫之叙即九疇之叙者也蓋洪範九疇原出於天鯀逆水性汨陳五

行故帝震怒不以畀之禹順水性地平天成故天以錫之耳先言帝不畀鯀而後言天錫禹則可見所謂畀所謂錫者即九疇所陳三才之至理即天下之大法初非有物之可驗有迹之可求也豈曰平水之後天果錫禹神龜而負夫疇乎仲虺曰天乃錫王勇智魯頌曰天錫公純嘏言聖人之資質天下之上壽皆天所賦予豈必有物而後可謂之錫乎使天果因禹功成錫之神龜以為瑞如簫韶奏而鳳儀春秋作而麟至則箕子所叙直

美禹功可矣奚必以鯀功之不成發之乎此其不可信者五也夫九疇之綱禹叙之猶羲文之畫卦也而其目箕子陳之猶孔子作彖象之辭以明易也武王訪之猶訪太公而受丹書也天以是理錫之禹禹明其理而著之疇以垂示萬世為不刊之經豈有詭異神奇之事乎鄭康成據春秋緯文有云河以通乾出天苞洛以流坤吐地符又云河龍圖發洛龜書感又云河圖有九篇洛書有六篇夫聖人但言圖書出於河洛而已豈嘗言龜

龍之事乎又烏有所謂九篇六篇者乎孔安國至謂天與禹神龜負文而出誠亦怪妄也矣人神接對手筆繁然者寇謙之王欽若之天書也豈所以言聖經乎此其不可信者六也然則洛書果何為者也曰河圖洛書皆天地自然之數而聖人取之以作易者也於洪範何與焉羣言淆亂質諸聖而止河出圖洛出書聖人則之者非聖人之言歟吾以聖人之言而斷聖人之經其有弗信者歟劉牧氏嘗言河圖洛書同出於伏羲之世而河

南程子亦謂聖人見河圖洛書而畫八卦吾是以知孔
安國劉向歆父子班固鄭康成之徒以為河圖授羲洛
書錫禹者皆非也或曰河圖之數即所謂天一至地十
者固也洛書之數其果何所徵乎曰洛書之數其亦不
出於是矣是故朱子於易啟蒙蓋詳言之其言曰河圖
以五生數合五成數而同處其方蓋揭其全以示人而
道其常數之體也洛書以五奇數統四偶數而各居其
所蓋主於陽以統陰而肇其變數之用也中為主而外

為客故河圖以生居中而成居外正為君而側為臣故
洛書以奇居正而偶居側此朱子之說也而吾以謂洛
書之奇偶相對即河圖之數散而未合者也河圖之生
成相配即洛書之數合而有屬者也二者蓋名異而實
同也謂之實同者蓋皆本於天一至地十之數謂之名
異者河圖之十洛書之九其指各有在也是故自一至
五者五行也自六至九者四象也而四象即水火金木
也土為分旺故不言老少而五之外無十此洛書所以

止於九也論其方位則一為太陽之位九為太陽之數
故一與九對也二為少陰之位八為少陰之數故二與
八對也三為少陽之位七為少陽之數故三與七對也
四為太陰之位六為太陰之數故四與六對也是則以
洛書之數而論易其陰陽之理奇偶之數方位之所若
合符節雖繫辭未嘗明言然即是而推之如指諸掌矣
朱子亦嘗言洛書者聖人所以作八卦而復曰九疇竝
出焉則猶不能不惑於漢儒經緯表裏之說故也嗚呼

事有出於聖經明白可信而後世弗之信而顧信漢儒傳會之說其甚者蓋莫如以洛書為洪範矣吾故曰洛書非洪範也河圖洛書皆天地自然之數而聖人取之以作易者也

詩辨

王直

聖人垂訓於方來也其見諸言行之間者既同且詳而盡心焉者於六經尤著焉六經非聖人之所作因舊文而刪定者也易因伏羲文王之著而述之大傳所以明

陰陽變化之理書因典謨訓誥之文而定之所以紀帝王治亂之迹春秋因魯史之舊而脩之所以明外伯內王之分詩因列國歌謠風雅之什而刪之所以陳風俗之得失禮所以著上下之宜樂所以導天地之和皆切於日用當於事情而為萬世之準則也其於取舍用意之際似寬而實嚴若疎而極密故學者捨六經無以為也奈乎秦燬之烈燔滅殆盡至漢嘗尊而用之而莫得其真或傳於老生之所記誦或出於屋壁之所秘藏記

誦者則失於舛謬祕藏者未免於脫畧先儒因其舛謬
脫畧復從而訂定務足其數而以已見加之其闕者或
偽為以補之或取其已刪者而足之其受禍之源雖同
而詩為尤甚夫詩本三千篇聖人刪之十去其九則其
存者必合聖人之度皆吟咏情性涵暢道德者也故聖
人之言曰興於詩教其子則曰不學詩無以言與門弟
子語曰詩可以興可以觀可以羣可以怨至於平居雅
言亦未嘗忘之詩之為用矇瞽之人習而誦之咏之闡

門被之管絃薦之郊廟享之賓客何所往而非詩邪後
世置之博士以謹其傳為用固亦大矣則其溫厚和平
之氣皆能感發人之善心者可知焉今之存者乃以鄭
衛淫奔之詩混之以足三百十一篇之數遂謂聖人之
所刪至如桑中溱洧之言皆牧豎賤隸之所羞道聖人
何所取而存邪玩其辭者何所興言之復何嘉邪學之
可益於德誦之閨門烏使其非禮勿聽邪被之管絃薦
之郊廟鬼神饗之賓客意何在邪是未可知也且聖人

又曰詩三百一言以蔽之曰思無邪然思且無邪見于
言者又何戾邪假使聖人實存之則其所刪者又必甚
於是邪或曰聖人存之者蓋欲後世誦而知恥所以懲
創人之逸志亦垂戒之意也是故春秋据事直書臣弑
其君子弑其父皆明言之而不隱及其成也皆知畏懼
詩之為意豈外是哉嗟乎舉善之是尚惡者固自知其
非且春秋者國史也備列國之事必欲見其莖弔會盟
聘享征伐嫁娶之節闕之則後世無所傳無所傳則後

世無所信故備書之而用意之深則在明褒貶於片言之間也然詩既為民間歌謠之什遺其善固不可失其惡又烏害於道乎由是論之則淫奔之詩在聖人之所刪蓋必矣且張載子厚嘗論衛人輕浮怠墮故其聲音亦淫靡聞其樂使人有邪僻之心而鄭為尤甚矣夫聖人教人以孝悌忠信恨不挽手提耳以囑之何迺以淫靡之樂而使人起邪僻之心乎故其論為邦亦曰放鄭聲然則揆之於理據之於經考之於聖人之言意雖有

儀秦之辨吾知其叛於理而失聖人垂訓之意矣

夷齊十辨

一辨夷齊不死于首陽山二辨首陽所以有夷齊之
跡三辨山中乏食之故四辨夫子用齊景公對說之
由五辨武王之世恐無夷齊六辨史記本傳不當削
海濱辟紂之事七辨道遇武王與周紀書來歸之年
不合八辨父死不葬與周紀書祭文王墓而后行者
不同九辨太史公之誤原於輕信逸詩十辨左氏春

秋傳所載武王遷鼎義士非之說亦誤

謹按論語第七篇冉有曰夫子為衛君乎子貢曰諾吾將問之入曰伯夷叔齊何人也曰古之賢人也曰怨乎曰求仁而得仁又何怨出曰夫子不為也第十六篇齊景公有馬干駟死之日民無德而稱焉伯夷叔齊餓于首陽之下民到于今稱之其斯之謂歟此二章孔子所以稱夷齊者事無始末莫知其何所指雖有大儒先生亦不得不取証於史記蓋孔子之後尚論古人無如孟

子孟子止言伯夷不及叔齊其於伯夷也大槩稱其制行之清而於孔子此二章之意亦未有所發惟史記後孔孟而作成書備而記事當時有以補前聞之缺遺如子貢夷齊何人之問孔子求仁得仁之對倘不得史記以知二子嘗有遜國俱逃之事則夫子不為衛君之微意子貢雖知之後世學者何從而知之也此史遷多見先秦古書所以為有功於世也然遷好奇而輕信上世之事經孔孟去取權度一定不可復易者史記反從而

變亂之以滋來者無窮之惑則遷之功罪豈相掩哉蓋
夷齊不食周粟之類是已史記既載此事于傳又於周
紀齊世家諸篇歷言文王武王志在傾商累年伺間備
極形容文字既工蓋人耳目學古之士無所折衷則或
兩是之曰武王之事不可以已而夷齊則為萬世立君
臣之大義也昌黎韓公之論是已其偏信者則曰夷齊
於武王謂之弑君孔子取之蓋深罪武王也眉山蘇公
之論是已嗚呼此事孔孟未嘗言而史遷安得此歟或

聞予言而愕曰謂孟子未嘗言則可首陽之事孔子章
章言之子既知有論語而又疑此則是不信孔子也子
應之曰予惟深信孔子是以不信史遷也且謂論語本
文何以言之夫齊景公有馬千駟死之日民無德而稱
焉伯夷叔齊餓于首陽之下民至于今稱之論語未嘗
言其以餓而死也而史遷何自知之餓者豈必皆至於
死乎夫首陽之隱未見其必在武王之世而二子昔嘗
逃其國而不立証諸孔子對子貢之意則可信矣安知

其不以逃國之時至首陽也孤竹小國莫知的在何所
傳者謂齊桓北伐山戎嘗過焉山戎與燕晉為鄰則孤
竹可知而首陽在河東之蒲坂詩之唐風曰采苓采苓
首陽之顛采苦采苦首陽之下或者即此首陽蓋晉地
也若夷齊果孤竹君之子則逃國以來諒亦非遠何必
曰不食周粟而後隱此邪今且以意度之國謀立君而
已逃去則必於山谷無人不可物色之所然後能絕國
人之思首陽固其所也蓋倉卒而行掩人之所不知固

宜無所得食又方君父大故顛沛隕越之際食亦何心
其所以兄弟俱在此者一先一後勢或相因而今不可
知耳然亦不必久居於此踰月移時國人立君既定則
可以出矣惟其遜國俱逃事大卓絕故後稱之指其所
嘗棲止之地曰此仁賢之跡也夫是以首陽之傳久而
不泯何必曰死於此山而後見稱邪予所以意其如此
者無他蓋論語此章本自明白於景公言死而於首陽
不言死後人誤讀遂謂夫子各以死之日評之耳此大

不然也夫孔子以景公與夷齊對言大意主於有國無國尤為可見問國君之富數馬以對諸侯曰千乘所謂有馬千駟者蓋斥言其有國也夷齊可以有國而辭國者也崔子弑景公之兄莊公而景公得立崔子猶為政景公安為之上莫之問也享國日久奉已而已觀其一再與晏子感慨悲傷眷戀富貴直欲無死以長有之其死也泯然一無聞之人耳孔子嘆之曰嗟哉斯人彼有內求其心棄國不顧如夷齊者獨何人哉彼所以千古

不泯者豈以富貴哉由此論之則孔子所以深取夷齊
但指其辭國一節而意自足若曰夫子取其不食周粟
以餓而死則此章本文之所無也夫今去夫子又遠矣
餓于首陽一語之外前不言所始後不言所終予疑其
在遜國俱逃之時而不死者蓋意之然予之意之也蓋
猶近似而無害於義理若遷之意之也畧無近似而害
於義理特甚焉大槩遷也專指文武為強大諸侯窺伺
殷室以得天下故於世家則首吳太伯於列傳則首伯

夷遷之說出而孔孟所以言文武盛德至仁者皆變亂
矣此事若不見取於大儒先生猶可姑存以俟來哲今
亦不幸君子可欺斷然按之以釋論語則武王萬世當
為夷齊之罪人夷齊借之以徇使萬世亂臣賊子知畏
清議如此也而武王何罪哉予言更僕未終亦不得已
也然實欲反覆究竟折服史遷使不可再措一辭者吾
徒之學誦詩讀書論世知人不當草草幸毋倦聽夫夷
齊孔子之言畧孟子雖不言叔齊而言伯夷甚詳若并

取証於孟子則史遷所載諫伐以下曉然知其決無也
孟子言伯夷之歸周也曰伯夷辟紂居北海之濱聞文
王作興曰盍歸乎來史記本傳則不然削其海濱辟紂
之事但於遜國俱逃之下即書曰於是往歸西伯及至
西伯卒此下遂書叩馬諫武王之語數其父死不葬以
臣弑君蓋以為過武王於道也所謂於是云者如春秋
之書遂事纔逃其國遂不復返而歸周也則不知此行
也二子亦已免喪否歟厄於勢而不返容或有之然逃

彼歸此如同時然身喪父死自不得與於哭泣之哀也而忍以父死不葬責他人歟嗚呼此必無之事也夫遷所以削其海濱辟紂者何哉謂遷為未嘗見孟子歟則遷知其有書七篇其作孟子傳自言嘗讀之而屢嘆矣然而如此書伯夷者其意可想也遷以不食周粟為竒節故欲見伯夷處心後來全不直武王而其初本無惡於紂也夫事不惟其實所不合已意則削之千載而下讀於是一語尚可想其遷就增損之情態而何以傳信

乎故曰當一以孟子為斷夫伯夷太公兩不相謀而俱歸文王孟子稱為天下之大老太公之老古今所共傳則伯夷之年當亦不相上下孟子必不虛加之也然伯夷德蓋昔縱與太公同而後來年齡豈必與太公等吾意武王之時未必猶有所謂伯夷也而遷所作周紀文自與傳不同何以言之伯夷以大老而歸文王文王享國凡五十年吾不知其始至也在文王初年歟中年歟末年歟不可考也而遷於周紀則嘗以為初年矣其言

曰文王繼公季而立敬老慈幼禮賢待士士以此多歸之夷齊在孤竹聞西伯善養老往歸之然後曰太顛閔天散宜生鬻子辛甲太公之徒皆往歸之然後曰崇侯諧西伯于紂囚于羑里然後曰紂釋文王賜弓矢鉞鉞得專征伐又數年而書聽虞芮訟又明年而書伐犬戎自此每年書一事而各以明年二字冠於其上如是者凡七上去夷齊來歸之年不知其幾矣大槩書文王五十年之事稍稍排布歲年而夷齊之歸為首其他未之

先也以天下之大老其來在文王即位未久之年若謂其人猶及武王已平殷亂天下宗周之後姑少計之亦當百有餘歲矣恐不必不食周粟隱于首陽山而考終已久矣遷既書於周紀如此及作伯夷傳乃言夷齊方至文王已卒道遇武王以木主為文王伐紂叩馬而諫不知此當為兩夷齊乎抑即周紀所書之夷齊乎若即周紀所書之夷齊則歸周已數十年非今日甫達岐豐之境也諫武王當於未舉事之初不當俟其戎車既駕

而後出奇駭衆於道路也太公與已均為大老出處素
與之同不於今日白首如新方勞其匆匆扶去於鋒及
將及之中也嗚呼紀傳一人作也乃自相牴牾如此尚
有一語之可信乎觀其摹寫二子冒昧至前左右愕眙
欲殺武王無語太公營救之狀殆如狂夫出關羣小號
喚而迂怪儒生姓名莫辨攘臂其間陳說勸止嗟乎殆
哉其得免於死傷也不亦幸哉武王方為天下去賊虐
諫臣毒痛四海之紂而行師無紀左右遽欲害敢諫之

士戕天下之父死生之命在左右與太公而武王若罔聞知萬一扶去之手緩不及用則是彼殺比干此殺夷齊其何以有辭於紂也武王順天應人之舉後世敢造此以誣之噫甚矣傳曰父死不葬紀則曰武王祭于畢東觀兵至于孟津載木主車中畢也者文王葬地也古無墓祭祭畢之說亦妄然一曰祭于畢一曰父死不葬又何也故凡遷書諫伐以下大率不可信使其有之孔子不言孟子言之矣子若以孔孟之說折遷遷未必屈

服惟傳自言之紀自破之其他卷猶曰破碎不全不盡
出於遷之手而此紀此傳皆遷全文讀者知其非遷莫
能作又不得疑其補綴於後人也曰然則紀與傳孰愈
曰紀書文王其妄居半及書武王則妄極矣若其書夷
齊一節猶畧優於傳也蓋紀言其歸周及文王之生而
傳言其至值文王之死也及文王之生者與孟子同而
值文王之死者無稽之言也曰然則首陽之事其究如
何曰予前固言之果有夷齊暫隱之迹而不在武王克

商之時武王克商之時恐已無所謂夷齊而孟子又不
言叔齊歸周惟後之讀論語者惑於遷史增加孔子本
文執所謂餓者為夷齊蓋棺之終事是以展轉附會爾
夫理至於一是而止予生百世之後安敢臆度輕破古
今共信之說蓋見遷於論語才有一字之增而遂與孟
子畧無一字之合又紀傳色色不同徒以無稽之言貽
惑後世是以詳為之辨庶幾自此觀夷齊者惟當學其
求仁得仁與夫制行之清廉頑立懦之類而不必惑其

叩馬恥粟以至於死然後語孟稱道之意可明也夫讀
論孟則見二子可師乃志士仁人甚自貴重其身抗志
甚高觀理甚明俯仰浩然清風可仰而不可及孔孟之
所謂賢由之則俱入堯舜之道也讀史記則見二子可
怪乃羈旅妄人闇於是非進退輕發嘗試不近人情悻
悻然以去終與自經於溝瀆而莫知之者比史遷之所
謂賢由之則不過於陵仲子之操也學者於此從語孟
乎從史記乎曰如此則遷無所據而容心為此何也曰

遷自言之矣所謂予悲伯夷之志睹逸詩可異焉者此
遷之所據乃一傳之病源也逸詩者西山采薇之章也
三百篇詩經夫子所刪尚莫知各篇為何人作遷偶得
一逸詩而妄意之曰此必夷齊也夷齊嘗餓于首陽今
言采薇西山是不食周粟故也夫古詩稱采草木蔬茹
于山者甚多豈皆有所感憤而不食人粟者乎粟生於
地人人食之已獨不食則食之者人人皆非也異哉恥
一武王而天下皆無與已同類之人然則試使夷齊之

教行一世之人無一人肯食周地之粟而後可乎夷齊
之風百世聞之而興起何當時此事無一人見之而聽
從乎夫天下所謂西山不知其幾自東觀之皆西也詩
言西山不言首陽不當以附會論語之所云也未句曰
吁嗟徂兮命之哀矣遷以為夷齊死矣悲哉此臨絕之
音也夫徂者往也安知作歌者之意不思有所往上言
我安適歸則無所辟地辟世矣下又言吁嗟徂兮則於
不可中求可猶思有所往焉既而遂自決曰命之哀矣

歸之於天而終無可奈何之辭也豈必為殂卒之殂乎
神農虞夏固不可見而以暴易暴何可以指武王武王
非暴君也必欲求其稱此語者則自春秋戰國至于秦
項滅國滅社何處不有乎然則世必有遭罹荼毒而作
此詩者非夷齊也此詩誤遷而遷誤後世也或曰然則
春秋之初魯臧哀伯曰武王克殷遷九鼎于洛邑義士
猶或非之杜元凱以為伯夷之屬也此在孔孟之間豈
亦非歟曰非也武成之後武王歲月無幾散財發粟釋

因封墓列爵分土崇德報功亟為有益之事則吾聞之
遷鼎恐非急務也滅人之國毀人宗廟遷其重器強暴
者之所為誰謂武王為之使果有所謂鼎則天下一家
無非周地在彼猶在此矣豈必皇皇汲汲負之以去而
後為快乎況罪止紂身為商立後宗廟不毀而重器何
必遷乎書稱營洛乃成王周公時事在武王無之義士
所非亦不審事實矣而義士又不知為何人自克商至
於周衰然後左氏載此語蓋已四五百年四五百年之

間豈無一士心非武王者得稱為義亦各有見也而何必以夷齊實之乎況左氏近誣未必斯言果出於哀伯乎嗚呼此武王夷齊終古曖昧俱受厚誣之事與咸丘蒙之徒妄言堯舜者頗同惜其出於孟子之後無一人識其為齊東野人之語故使流傳至今幸而竊讀論語偶思首陽之章未嘗言死遂得以盡推其不然惟此章之疑既釋則史遷失其所以憑藉附會之地豈非古今之一快哉然此愚見也不知來哲又以為然否

明文衡卷十四